

廿一日。盘告言：费多尔斯最精机器，满吉斯得有机厂；其家住伦敦，亦藏有机器，可一往观。威勒斯里告言：法克斯亦精煤学，其煤厂在得尔阿姆，距满吉斯得、栗温浦皆不远，在伦敦之北。其西曰威尔斯，煤产最佳，可次第往观。又达摩森函约赴阿尔什拍弗尔公班尼阿甫克罗塞会叙。阿尔什拍弗尔，言尊贵也；公班尼，会也；克罗塞，犹言买卖。盖商会也。达摩森为其局马斯得，译言总办也；次曰洼尔登，犹言帮办。晚赴赫克斯茶会，美国之富妇也。晤世爵二人，曰巴伦罗尔得，曰巴色斯；议政院二人，曰珥思定梅尔，曰吉尔得斯；绅士一人，曰吉尔伯尔，自云曾至中国；提督一人，曰英格尔菲尔。其珥思敦梅尔，则其夫人约往一会也在下议院司文案，英国之有文学者。其夫人约往一谈。又类里一人，曰瑞斯得甚美，亦约往一谈。

廿二日。夜梦为诗甚豪，醒记二语云：一自彩云飞散后，十万骊驹惜别声。不详其为何语也。二十年不乐为诗，从不以置怀，而梦中往往得句，何也？马根、马克斯威诺枉过久谈。马根，镇江税务司帮办，与李湘甫同船西来者也。马格里译言摩尔安。马与摩、根与安，皆音之转也。马克斯威诺述伯克鲁公之意，约赴苏格兰公会，以马格里亦苏格兰人也。实苦仪节语言皆钝拙，不乐周旋，力辞之。而马君邀请勤勤，以中国人初至，以得一与会为佳话也。

廿三日。礼拜。接上海文报局二月初八日信第十六号，内只唐景星信一件，告知旗昌轮船公司以银二百廿二万两归并招商局，正月十七付过银百廿万，馀按年摊付，其船栈已换用招商局旗矣。唐景星可谓有魄力者。

廿四日。胜全恩燮斯巴雷司（接）〔谒〕见（太公子）〔大太子〕。中外新报载各国炮船、炮兵：英国大小铁甲船五十八内有铁炮台船，铁甲有十四寸及二十四寸厚者，大铁木兵船八十，小铁木兵船二百